

आकाशवाणी

- 1 ओम बिरला होरें गी दुई बारी लोकसभा दे स्पीकर दे तौर पर चुनेआ गोआ ऐ। प्रधानमंत्री नरेंद्र मोदी, राहुल गांधी ते होरनें दुइएं पार्टिं दे नेताएं नमें स्पीकर होरें गी मुबारकबाद दिती।
- 2 त्रै नमें आपराधिक कनून भारतीय न्याय संहिता 2023 भारतीय नागरिक सुरक्षा संहिता 2023 ते भारती साक्ष्य अधिनियम अगले म्हीने दी पैहली तरीक थवां लागू होंगन।
- 3 विदेश मंत्री डॉ. एस. जयशंकर होरें भारत कन्नै लगदे म्यांमार दे बन्ने पर लगातार होआ रदी हिंसा ते अस्थिरता गी लेइए अपनी चैंता जाहिर कीती।
- 4 नशीले पदार्थें ते अवैध तस्करी दी रोकथाम सरबन्धी कुल संसारी ध्याड़ा अज्ज मनाया जा'रदा ऐ।
- 5 मौसम विभाग नै अगले त्रै-चार दिनें च उत्तरी भारत दे ज्यादातर हिस्सें ते उत्तरी अरब सागर ते बिहार च दक्खन पच्छिम मानसून दे अगगे बदने आस्तै मौसम साजगारर दस्सेया ऐ।

<><><><><><>

LS-Speaker

बीजेपी दे वरिष्ठ सांसद ओम बिरला होरें गी अज्ज इक बारी फ्ही लोकसभा अध्यक्ष दे तौर पर चुनेआ गोआ ऐ। उनें गी ध्वनिमत कन्नै चुनेआ गोआ ऐ कीजे बरोधी धड़े नै इस औहदे लेई कांग्रेस सांसद के. सुरेश होरेंगी अपना मेदवार बनाया हा पर उनें सदन च वोटें दी बंडु आली मंग नेई कीती। चुनां दे बाद प्रधानमंत्री नरेंद्र मोदी, बरोधी धड़े दे नेता राहुल गांधी ते संसदी कार्यमंत्री किरिन रिजिजू होर श्री बिरला होरें गी अध्यक्ष दे आसन तोहड़ी लेइये गो। एहदे शा पैहले अज्ज बड़ुलै जिसले सदन दी बैठक शुरू होई तां प्रधानमंत्री ते एनडी गठबंधन दे होरनें नेताएं श्री बिरला होरें गी अध्यक्ष दे तौर पर चुने लेई प्रस्ताव पेश कीता जदकि बरोधी धड़े नै के. सुरेश हुंदे पक्ख च प्रस्ताव पेश कीता। अध्यक्ष चुने जाने पर बिरला होरें गी मुबारकबाद दिंदे होई प्रधानमंत्री होरें आखेआ जे बिरला हुंदे दुई बारी चुने जाने पर अज्ज इतिहास बनी गोआ ऐ। उनें आखेआ जे सदन अगले 5 बरे उंदे मार्गदर्शन हेठ कम्म करोग। उनें आखेआ जे सांसद दे तौर पर बिरला हुंदे कम्म नमें सदस्यें दा दिल बधांगन। तोआई बरोधी धड़े दे नेता राहुल गांधी होरें ओम बिरला होरें गी मुबारकबाद दिंदे होई आखेआ जे एह सदन लोकें दिएं आसें-तांगें दी नुमाइंदगी करदा ऐ। उनें जकीन दोआया जे बरोधी धड़ा संसद गी बवस्थित ढंगै सिर चलाने आला अपना सैहयोग देग। उनें आखेआ जे सदन च बरोध दिआं अवाजां बी बुलंद होन दित्तियां जानियां लोड्चदियां न। समाजवादी पार्टी दे नेता अखिलेश यादव होरें मेद जताई जे बरोधी धड़े गी अपन गल्ल रक्खने दा सुद्दा मौका थहोग। अपने संबोधन च श्री बिरला होरें परतियै सदन दे अध्यक्ष दे तौरा पर कम्म करने दा मौका देने ते उंदे पर विश्वास करने लेई सब्बनें सदस्यें दा धन्नवाद कीता। उनें आखेआ जे संसदी कदरें ते लोकतांत्रिक परम्पराएं गी समृद्ध बनाना उंदी प्राथमिकता होग। उनें आखेआ जे पिछले दहाके च लोकें दिआं आसां-तांगां बधिया न ते एह सब्बनें सांसदें दी सांझी जिम्मेदारी ऐ जे ओहू इनेंगी पूरा करने लेई किट्टे रलियै जत्त करन। बिरला होरें सदस्यें गी आखेआ जे ओहू सार्थक चर्चा करन ते जेगर बरोध बी करना ऐ तां सदन दी गरिमा गी बरकरार रक्खदे होई गै बरोध करन।

<><><><><><>

PM-Om Birla

प्रधानमंत्री नरेंद्र मोदी होरें ओम बिरला होरें गी दुई बारी लोकसभा अध्यक्ष चुने जाने पर बदाई दिती ऐ। इक सोशल मीडिया पोस्ट च उनें आखेआ जे सदन गी उंदे तजुबे ते ज्ञान थवां फायदा होग। मोदी होरें बिरला होरें गी अगगे दे कार्यकाल आस्तै शुभकामनां दित्तियां।

<><><><><><>

Shah-Om Birla

केंद्री गृह मंत्री अमित शाह होरें ओम बिरला होरें गी इक बारी फही लोकसभा दा अध्यक्ष चुने जाने पर मुबारकबाद दिती ऐ। सोशल मीडिया दी इक पोस्ट च शाह होरें आखेआ ऐ जे संसद लोकतंत्र गी सशक्त बनाने च बिरला हुंदी मिसालजोग बचनबद्धता भारती संविधान ते एहदे च दस्सी गेदी मुल्लें-कदरें गी होर बल देंगन।

<><><><><><>

PM-Emergency

प्रधानमंत्री नरेंद्र मोदी होरें आखेआ ऐ जे उनेंगी इस गल्लै दी खुशी ऐ जे लोकसभा अध्यक्ष ओम बिरला होरें अज्ज एमरजेंसी दी सख्त निंदेआ कीती ते उस दरान कीते गेदे जुल्में पर लो पाई ते लोकतंत्र दी जिस तरीके हत्तेआ कीती गेई ही, ओहदा बी जिक्र कीता। सोशल मीडिया दी इक पोस्ट च श्री मोदी होरें आखेआ जे एमरजेंसी 50 बरे पैहले लाई गेई ही पर एह जरूरी ऐ जे अज्जै दे नौजवान बी एहदे बारे च जानन कीजे एमरजेंसी दे दरान संविधान गी मिंदियै जनता दी राय गी दबाई दिता गेआ हा ते संस्थानें गी बी तबाह करी दिता गेआ हा।

<><><><><><>

New Criminal Law

त्रै नमें कनून भारतीय न्या संहिता 2023, भारतीय नागरिक सुरक्षा संहिता 2023 पैहली जुलाई थवां लागू होई जाडन। इनें कनूनें गी पिच्छले बरे संसद दे स्याले आहले सत्र दौरान पास कीता गेआ हा। एहदा मकसद भारतीय नागरिकें गी सशक्त बनाना ऐ। इंदा मकसद हर इक लेई न्याय प्रणाली तगर पुज्ज यकीनी करना ते हर कुसै गी न्याय दोआना ऐ। नमे ंआपराधिक कनूनें च जांच, मुकद्दमे ते अदालती कार्रवाई च प्रौद्योगिकी पर जोर दिता गेआ ऐ जेदे तैहत हुन हर थाने च एफ.आई.आर दर्ज कीती जाई सकदी ऐ। नमें कनून तैहत अपराध आली थाहर फोरेंसिक माहिर दा जाना जरूरी ऐ। सूत्रें मुजब सरकार राज्यों ते केंद्र शासित प्रदेशें कन्नै नियमित बैठकां ला'रदी ऐ। नमें आपराधिक कनूनें दे मुख् प्रावधानें च घटनाएं दी आनलाइन रिपोर्टिंग करना, कुसै बी पुलस थाने च प्राथमिकी दर्ज करना ते पीडितें गी प्राथमिकी दी मुफ्त कापी उपलब्ध कराना शामिल ऐ। एहदे अलावा कुसै व्यक्ति गी गिरफ्तार कीते जाने पर उसी अपनी पसंद दे व्यक्ति गी अपनी स्थिति दी जानकारी देने दा हक्क होग। नमें कनूनें च महिलाएं ते बच्चें खलाफ होने आली हिंसा दी जांच गी तरजीह दिती गेई ऐ। इस चाल्ली कन्नै मामले दा नबेडा सूचना दर्ज होने दे 2 म्हीने दे अंदर करना होग। समन हुन इलैक्ट्रानिक तौर पर जारी कीते जांगन। एहदे कन्नै कनूनी प्रक्रिया च सुविधा होग। कागजी कम्में च कमी और ते मामले कन्नै सरबन्धी लोकें बश्कार बेहतर संपर्क होई सकोग। सूत्रें दस्सेआ ऐ जे नमें आपराधिक कनूनें च जांच, मुकद्दमें ते अदालत कार्रवाई च प्रौद्योगिकी पर जोर दिता गेआ ऐ। राष्ट्रीय अपराध रिकार्ड ब्यूरो एन.सी.आर.बी नै मौजूदा अपराध ते आपराधिक ट्रैकिंग नेटवर्क ते सिस्टम सी.सी.टी.एन.एस एप्लीकेशन च संशोधन कीते गए न।

<><><><><><>

TMC-Rijju

लोकसभा अध्यक्ष दे चुनां दरान वोटें दी बंड आली मंग गी अस्थाई स्पीकर हुंदे आस्सेआ मंजूर नेई करने दे आरोपें गी खारिज करदे होई संसदी मामलें दे मंत्री किरन रिजिजू होरें दावा बन्नेआ ऐ जे बरोधी धड़ें आस्सेआ इस बारै कोई औपचारिक मंग नेई कीती गेई ही। संसद बाहर पत्रकारें कन्नै गल्ल करदे होई रिजिजू होरें आखेआ जे सरकार वोटें दी बंडु आली बवस्था आहनना चाहंदी ही। हालांकि ध्वनिमत दे दरान जिसले अध्यक्ष दे औहदे लेई चुनां होआ तां बरोधी धड़े नै कुसै किस्मै दी कोई औपचारिक मंग नेई कीती।

<><><><><><>

Jaishankar-Myanmar FM

विदेश मंत्री डॉ. एस. जयशंकर होरें म्यांमार दे विदेश मंत्री हुंदे कन्नै भारती बन्ने पर म्यांमार च जारी हिंसा ते अस्थिरता पर भारत दी चिंता गी लेइए चर्चा कीती। डॉ. जयशंकर होरें म्यांमार दे उप

प्रधानमंत्री ते विदेश मंत्री शू थान रवे हुंदे कन्नै नमीं दिल्ली च मलाटी कीती। जयशंकर होरें आखेआ जे भारत इस स्थिति कन्नै निब्वडने च सब्बै सरबंधी धडें गी शामिल करने दा इच्छुक ऐ। सोशल मीडिया पोस्ट च डॉ. जयशंकर होरें आखेआ जे ओहू खासतौर पर नशीले पदार्थ, हथियारें दी तस्करी ते मानव तस्करी जनेई चुनौतिएं गी तरजीह दिंदे ना। उनें मयावाड़ी च फसे दे भारतीय नागरिकें दी तौले वापसी च सहयोग करने दी इच्छा जताई।

<><><><><><>

Paraguay-ISA

पैरागुआ अंतरराष्ट्रीय सौर गठबंधन च पूर्ण सदस्य दे तौर पर शामिल होने आला 100मां मुख बनी गेआ ऐ। विदेश मंत्रालय नै आखेआ ऐ जे नमीं दिल्ली च दडिपाजिटरी प्रमुख संयुक्त सचिव अभिषेक सिंह हुंदे कन्नै पैरागुआ दे राजदूत फ्लेमिंग राउल हुंदी बैठक दौरान सरबंधी दस्तावेज सौंपे गए।

<><><><><><>

BJP-Congress

भारती जनता पार्टी नै कांग्रेस दी एह आखेदे होई नुक्ताचीनी कीती जे संविधान दियां प्रतियां लेई उसी संसद च दस्सिए संविधान दी हिफाजत नेई कीती जाई सकदी। नमीं दिल्ली च मीडिया कर्मिं गी संबोधित करदे होई पार्टी प्रवक्ता संवित पात्रा होरें आखेआ जे कांग्रेस दे सांसद संविधान दे रखवाली बनिए दस्सने दी कोशश करा रदे ना। उनें गलाया जे 1975 च कांग्रेस नै सत्ता लेई एमरजेंसी लाई। उनें एमरजेंसी दौरान दरपेश मुश्कलें दा बी जिक्र कीता।

<><><><><><>

NDA-Protest

सत्ताधारी एनडीए पार्टी दे सांसदें 1975 च लाई गेदी एमरजेंसी खलाफ संस दे बाहरें अज्ज प्रदर्शन कीता। सत्तारूढ सांसदें तख्तियां दस्सदे होई नारे लाए ते साबका प्रधानमंत्री इंदिरा गांधी हुंदे आस्सेआ आपातकाल लाए जाने आस्तै कांग्रेस सोयां माफी मंगने लेई आखेआ। मीडिया कन्नै गल्ल करदे होई संसदीय कार्यमंत्री किरन रिजिजू होरें आखेआ जे 1975 च अज्ज दे दिन उस्सलै दी प्रधानमंत्री इंदिरा गांधी होरें इक बैठक बलाई ते एमरजेंसी लाई ही।

<><><><><><>

Internationak Day agains Drug Abuse

नशा ते अवैध तस्करी दी रोकथाम सरबंधी कुल संसारी ध्याडा अज्ज मनाया जा रदा ऐ। अरूणाचल प्रदेश च इटानगर जिला प्रशासन नै शैहर च केई जागरूकता कार्यक्रम आयोजित कीते। इनें कार्यक्रमें दा मकसद क्षेत्र च बददे नशीले पदार्थें ते अवैध तस्करी दी समस्या कन्नै निब्वडना ऐ। इनें कार्यक्रमें दे इक हिस्से दे तौरा पर राम कृष्णन मिशन अस्पताल सोयां आकाशदीप तगर इक रैली दा सरिस्ता कीता गेआ। इक होर रैली बेज बेज तिनली थवां उत्तर पूर्वी क्षेत्रीय विज्ञान ते प्रौद्योगिकी संस्थान एन.ई.आर.आई.एस.टी. वोट तगर कड्डी गेई। स्वयंसेवकें ते मुकामी संगठनें सनें बक्ख-बक्ख समुदाय दे सदस्यें सक्रिय हिस्सेदारी कीती।

<><><><><><>

Doda-Encounter

डोडा जिले दी गंदोह सब डिविजन च बजाड आले जंगली इलाकें च अज्ज बडुलै सुरक्षाबलें ते आतंकवादिं बश्कार टाक्करा शुरू होआ। स्हाडे जिला संवाददाता फैयाद पाम्पोरी मुजब सुरक्षाबलें 3 आतंकवादिं गी मारी मकाया ऐ। सूत्रें मुजब बडुलै कोई 9 बजे सुरक्षाबलें सिन्नू पंचैत दे बजाड जंगलें च तपाशी अभियान चलाया जेहडा तौलें गै टाक्करे च तब्दील होई गेआ। पुलस सूत्रें मुजब आतंकवादिं दे सफाए लेई आधुनिक तकनीकें दा इस्तेमाल कीता गेआ ऐ। खीरी जानकारी थोने तगर उत्थे मारे गेदे त्रोंने आतंकवादिं दियां लोथां बरामद करी लैतिआं गेइयां ना। टाकरे आले थारें परां अमरीका च बनी दियां 2 एम-4 रफलां बरामद कीतियां गेइयां न ते होर ब्यौरे गी बलगेआ जा रदा ऐ।

<><><><><><>

IMD

अगले त्रुं-चुं दिनें च उत्तरी भारत दे ज्यादातर हिस्सें ते बिहार, झारखंड, पच्छिम बंगाल, छत्तीसगढ, राजस्थान, मध्य प्रदेश, गुजरात ते उत्तरी अरब सागर दे बाकी हिस्सें च दक्खन पच्छिम मानसून दे अगगे बढने लेई माहौल साजगार ऐ। भारती मौसम विभाग नै आखेआ ऐ जे कल तोड़ी कोंकण, गोवा, तटीय कर्नाटक, केरल ते तमिलनाडू च मती भारी बरखा होई सकदी ऐ। इये नेय हालात अगले त्रुं चुं दिनें लेई उत्तरी पूर्वी सिक्कम, बिहार ते ओडिशा च बी जारी रौहंगना।

<><><><><><>

CAQM

हवा दी गुणवत्त सरबन्धी प्रबन्धन आयोग नै राश्ट्रीय राजधानी क्षेत्र दिल्ली ते आले दोआले दे क्षेत्रें च 4 करोड़ 50 लक्ख बूटे लाने दा लक्ष्य तय कीता ऐ। एहू कम्म माली बरे 2024-25 दौरान कीता जाग। पिछले बरे पूरे एनसीआर च लगभग 3 करोड़ 85 लक्ख बूटे लाने दा लक्ष्य हा जिसदे चा इक बरे लगभग 3 करोड़ 60 लक्ख बूटे सफलतापूर्वक लाए गए। पर्यावरण, जंगल ते जलवायु परिवर्तन मंत्रालय नै आखेआ ऐ जे आयोग शैक्षणिक संस्थानें, अनुसंधान आधारित संगठनें ते होर दुए वाणिज्जियक ते औद्योगिक इकाइए च बड्डे पैमाने पर हरियाली ते जैव विविधता पर जोर देआ रदा ऐ।

<><><><><><>